

PLEIV SUMVITG

Rapport annual 2023/24 dil president

“Con spert che quei temps varga, con spert che quei onn ei spiraus”

Da quellas remarcas aud’ins adina puspei. Ed era ella pleiv eisi buca auter e nus essan danovamein serimnai tier la radunonza da pleiv.

En quei temps dad in onn eisi schabegiau sil mund enorm bia dil bien ed era dil mal. Uiaras e conflicts, violenza e terror, ni detg cuort, il negativ ha puspei dominau nies mund. Bials e buns schabetgs, eveniments positivs che dattan curascha, che laien selegrar ha ei era dau nundumbreivels, denton vegnan quels pil pli buca pendi vid il zenn grond. Per cletg ein els tuttina cheu e laien sentir nus ch’ei dat sper tut il stgir era bia glisch che dat forza e curascha als carstgauns che vegnan sin lur viadi tras la veta di per di cunfruntai cun da tuttas uisas obstachels. Saver crer ch’ei dat tuttina enzatgi ni enzatgei che porscha agid sin nies viadi ei in dils privilegis da nossa cardientscha.

Quei privilegi dalla cardientscha ensemen cun quel da saver viver en ina tiara segira e beinstonta nua che mintgina e mintgin vegn respectaus sco el ei, lai bein savens patertgar nus che nus vivin atgnamein sco el paradis.

Gest ord quell’optica lein nus sco communitad da pleiv porscher nua che quei ei pusseivel nies maun d’agid a quels che ein buca en in paradis sco nus.

Stimau sur Saji

Preziadas parochianas, preziai parochians

Sco president dalla pleiv Sumvitg hai jeu il duer da rapportar sur dallas activitads da nossa pleiv dapi la davosa radunonza generala dils **25 da matg 2023** ed jeu entscheivel gest cun las fiastas da baselgia.

La gievgia, ils **8 da zercladur havein festivau la fiasta da Sontgilcrest a Sumvitg**. Uestg Antonius da Neu-Dehli e duas muniessas dall'India che fuva quels dis sin viseta tier sur Saji han festivau quella fiasta ensemen cun nus ed aschia enfirmiu nos stretgs ligioms culla communidad dils christians dall'India. La dumengia, ils **11 da zercladur ei stada la fiasta da Sontgilcrest per Rabijs e Surrein a Surrein**. Ina pulita parada ha accumpignau il plevon ed ils premcommunicants en baselgia e silsuenter in bi pievel a processiun.

Ils 18 da zercladur ei vegniu festivau a Sumvitg la fiasta da sogn Mudest. Sur Alexi Manetsch ei staus il celebrant principal e predicatur da fiasta. Igl ei stau il giavisch da sur Alexi d'aunc inaga saver festivar la fiasta da sogn Mudest a Sumvitg e nus vein bugen dau suatientscha a siu giavisch, quei era sco engraziament per tut ils buns survetschs che sur Alexi ha fatg biars onns e fa aunc adina per nossa pleiv.

In pievelun ha priu part dalla fiasta, ch'ei surtut enconuschenta pervia da sia processiun cun sogn Mudest e las numerus statuas e reliquias d'auters sogns e sontgas e culla gronda ed impressiunonta parada dalla cumpignia da mats e la musica da Sumvitg/Cumpadials.

Ils 27 d'uost havein festivau la fiasta da cor da Maria, la perdanonza da Surrein cun musica e parada, processiun e messa festiva cun cant festiv dil chor mischedau da Surrein.

In'jamna pli tard, **ils 3 da settember ei lu stau la perdanonza a Rabijs, la fiasta dil Num da Maria** cun l'usitada processiun cun musica e parada. La messa dalla fiasta ei vegnida embellida cun bi cant dalla solista Manuela Gschwend-Berther, oriunda da Rabijs, accumpignada digl organist Dario Canal.

Era las **perdanonzas en nos uclauns: a Clavadi el meins da matg, a Laus igl uost, a sogn Benedetg il settember e la perdanonza da sogn Giusep ils 19 da mars a Cumpadials** ein vegnidas festivadas cun messa cantada dil chor mischedau da Sumvitg/Cumpadials.

Per las fiastas principals dalla Baselgia sco Nadal, Pastgas e Tschuncheismas sespruein da rotar denter ils loghens da baselgia, aschia che mintga liug ha inagada la messa principala dalla dumengia allas 10.00, quei che ei buca adina aschi sempel.

La fiasta da Nadal 2023

Il survetsch divin culs affons e lur famiglias havein nus festivau a Rabius. La messa da Nadal notg per l'entira pleiv a Surrein e la fiasta da Nadal di a Sumvitg. La messa da Nadal notg ed era la messa da Nadal ein vegnidas embellidas cun bi ed impressiunont cant dils chors da baselgia.

Era la liturgia dalla jamna sontga e da Pastgas havein saviu festivar en nossas treis baselgias da Rabius, Sumvitg e Surrein.

Gliendisdis Pastgas havein nus festivau a Surrein dumengialva, la **fiasta dall'emprema sontga communion** cun 2 premcommunicantas e 3 premcommunicants. Nossa preziada catecheta Pierina Dolf-Tschuor ha preparau ils affons per quei di cul tema **"La spigia porta il graun pil paun"**.

Engraziel fetg al chor mischedau da Surrein che ha embelliu la fiasta en baselgia ed alla societad da musica Sumvitg/Cumpadials che ha dau la tempra da fiasta durant igl aperitiv.

Ils 6 da matg han 17 affons dalla 5avla e 6avla classa **retschiert il sacrament dalla s. creisma**. Igl uestg da Cuera ha uonn incumbensau avat Vigeli dalla claustra da Mustér cun quella missiun. Igl ei stau ina biala ed impressiunonta fiasta ella baselgia fullanada da Rabius. Pierina ha per l'emprema gada era instruiu e preparau ils affons per la creisma. Cun grond tschaffen ed engaschi cumplein han ils affons collaborau activamien tier il survetsch divin da creisma. Igl ei stau fetg bi.

Pierina ch'ei mumma da duas buobas ha in bien maun d'instruir ils affons a moda semplia e capeivla. Engraziel fetg ad alla per siu zun preziau e fetg schazegiau engaschi.

Ton la fiasta da dumengialava sco quella dalla creisma ein sesplagadas cun agid da biars. Perquei engraziel a tut quels che ein s'engaschai per che quellas duas fiastas gartegian, en special era als geniturs da nos affons. Engraziel fetg era al chor mischedau da Sumvitg/Cumpadials ch'ha embelliu il survetsch divin da creisma a Rabiis.

Dumengia da suppa ella pleiv

Duront il temps da cureisma ha il cussegl pastoral envidau parochianas e parochians alla dumengia da suppa a Rabiis, Surrein e Sumvitg. A Surrein ei la tradiziunala lottaria in eveniment tut special pils affons che han pil pli lu era il cletg da trer quei ni tschei premi. Engraziel fetg al cussegl pastoral ed a tuttas gidontras e gidonters per l'organisaziun en mintga vitg. La presidenta dil cussegl pastoral di a nus en siu rapport tgei recav che quellas dumengias da suppa han purtau.

Casa pervenda a Sumvitg

Naven da l'entschatta matg 2024 havein nus novs locaturs ella casa pervenda dacuort renovada a Sumvitg. Lotar e Johanna Jacomet han priu leu dimora ensemen cun lur dus tgauns. Nus sperein ch'els sesentien bein sper clutger a Sumvitg e giavischein ad els tut bien en casa pervenda.

Fossa comunabla en santeri a Rabiis

Sur dil project "fossa comunabla a Rabiis" hai jeu gia rapportau ellas duas davosas radunonzas da pleiv.

Ed ussa eisi aschi lunsch. La suprastonza comunala ha approbau il project che la suprastonza da pleiv ha presentau. Sut informaziuns vegnel a presentar a vus la fossa comunabla el santeri da Rabiis che vegn erregida el decurs dils proxims meins.

Formaziun dil plaz cadruvi a Rabius

La suprastanza dalla pleiv ha delegau il vicepresidente Armin ella grupp da lavur per la formaziun dil plaz cadruvi da Rabius che ei lundervi dad elaborar in project che duess proximamein vegnir presentaus.

Plonta sper santeri a Rabius

Il zercladur 2022 a caschun dad ina fiasta da giuventetgna organisada dall'Uniun da giuventetgna da Rabius, han vandals derschiu igl ischi plantaus avon santeri da Rabius. Quel era vegnius regalaus alla pleiv dil vischin Jürg Hofmann che ei sez hortulan.

Ussa dacuort, bunamein 2 onns pli tard, ha la giuventetgna da Rabius plantau in niev ischi da muntogna en quei liug e nus sperein che quel sapi catschar ragischs e survivor tut ils differentes events entuorn el.

Nos morts

Tier la veta sauda era la mort e nossa communitad da pleiv ha stuiu prender cumiau da 20 personas ch'han anflau il ruaus perpeten en in da nos santeris.

Lein en pietad seregurdar dad els:

	<i>Datum dalla mort vegliadetgna</i>	
Lizia Bearth-Decurtins, Rabius	15-07-2023	86 onns
Aurelio Monn-Casanova, Sumvitg	24-07-2023	86 onns
Genoveva Cadruvi-Pelican, Surrein	07-10-2023	98 onns
Erna Cathomas-Baselgia, Surrein-Val	13-10-2023	79 onns
Stanislaus Cathomas-Mathiuët, Cumpadials	14-10-2023	93 onns
Mariuschla Kuster-Monn, Rabius	17-10-2023	82 onns
Jacinta Castelberg, Rabius	29-10-2023	79 onns
Tresa Schmed, Casa s. Giusep, Cumpadials	24-11-2023	81 onns
Rosa Albrecht-Bundi, Surrein	04-12-2023	88 onns
Maria Candinas-Frezza, Surrein	05-12-2023	78 onns
Matilda Bearth, Rabius	10-12-2023	65 onns
Trudi Duff-Schüpfer, Cumpadials-Laus	11-12-2023	95 onns
Victoria Tgetgel, Rabius-Runs	18-12-2023	93 onns
Josef Schmid, Surrein	10-02-2024	80 onns
Irena Nay-Schmid, Surrein	12-02-2024	87 onns

Valentina Schmed-Vincenz, Surrein	12-02-2024	90 onns
Maria Giger-Curschellas, stada sesenta ad Igis Landquart e Laus	08-03-2024	78 onns
Marcus Cabalzar, Siltginas	20-03-2024	59 onns
Gerardo Repole-Bearth, Rabius	29-04-2024	71 onns
Gion Antoni Deflorin, Falens	06-05-2024	102 onns

Il Segner regali a nos defuncts che han bandunau nus dapi la davosa radunonza da pleiv ed era a tut ils auters defuncts che ruaussan en nos santeris il ruaus celestial. Nus seregurdein dad els en in cuort memento.

Diember diminuend da parochianas e parochinas

Sco dapertut el vest dall'Europa sesminuescha la participaziun tier survetschs divins era tier nus onn per onn. Nossa pleiv dumbrava per la fin **2023 843 persunas catolicas**. La statistica di che ca. 10–12 % dils catolics practicheschan lur religiun, quei vul dir tier nus che tenor la statistica eisi ca. 100 persunas che serepartan sin treis loghens da baselgia. Demai ch'ei vegn celebrau mintga dumengia survetsch divin en mintgina da nossas baselgias ei la participaziun en mintgina da quellas plitost pintga. Quei ei la realitad e quei problem selai buca midar mo aschia.

Extradas dalla baselgia

Dapi la davosa radunonza da pleiv ha la suprastonza stuiu prender encunter 15 extradas dalla Baselgia catolica da parochianas e parochians da nossa pleiv. Tier la davosa radunonza da pleiv haiel annunziau il diember da mo 4. Sper la raschun dalla taglia ei la malcontentientscha culla Baslegia catolica e siu secuntener en connex culs numerus cass d'abus ed era la tenuta conservativa buca adina capeivla, las raschuns pricipalas per quellas decisiuns.

Engraziaments

Igl emprem e grond engraziament admittel a nies plevon sur Saji per sia gronda e zun preziada lavur da pastoraziun en nossa pleiv, per ils bials survetschs divins e buns priedis e la buna collaboraziun che nus astgein haver cun el. Ed jeu less era far in compliment ad el pil grond progress da discuorer romontsch. Mo vinavon aschia e buca schar suenter cun emprender nies bi

lungatg. Sur Saji ei ussa 5 onns e miez cheu tier nus e nus sperein ch'el hagi vinavon bia plascher e satisfacziun en nossa pleiv.

En quei mument engraziel era a tut quellas persunas che segidan cun nies plevon tier las translaziuns dils differentes texts pils survetschs divins.

Grond engraziament allas gruppas da liturgia da Rabius, da Sumvitg/Cumpadials e da Surrein cun lur menadras per lur zun preziau engaschi ella pastoraziun ed en baselgia.

Alla menadra dil cussegl pastoral Gabriela Lutz ed a siu team sco era a tut quellas e quels che segidan els singuls loghens da baselgia cul cussegl pastoral, engraziel grondamein per lur zun preziada lavur. En siu rapport vegn la presidenta a rapportar sur digl engaschi dil cussegl pastoral.

Allas ministrantas ed als ministrants sco era als affons ch'han quest onn entschiet a ministrar engraziel jeu da cor. En num dalla suprastonza da pleiv engraziel jeu era specialmein a lur geniturs che segidan e promovon lur affons tier quei survetsch aschi impurtont per nossa communitad e baselgia.

Allas calustras ed als calusters da nossas baselgias e capluttas ed a tuts quels che segidan ultra da quels pil beinfuncziunar dils survetschs divins cun substituziuns e cun decorar las baselgias e capluttas nies grond engraziament.

All'organista Evelina Giger ed als organists Armon Bearth, Retus Giger, Flurin Monn e Marcel Pöhl admittel in grond engraziament per lur survetsch tier survetschs divins e sepulturas.

Als dus cors da nossa pleiv ed alla dirigente Andrea Schmed-Camathias e al dirigent Rest Tuor engraziel pil bi cant festiv tier las fiastas e perdanonzas.

Agl ugau-santeri e pervenda Marcel Pöhl ed als ugaus-caplutta sco era agl ugau dils zenns da Sumvitg engraziel grondamein per lur preziada lavur.

Jeu engraziel era a tut quellas e quels che lavuran per nossa pleiv el tgeu e che jeu haiel buca numnau oz specialmein.

In special engraziament admettel al vicepresidente ed actuar Armin Candinas per sia zun preziada lavur en suprastonza e per la fetg emperneivla collaboraziun.

Vus tuts saveis, per ina gronda part dallas lavurs che ston vegnir fatgas per che nossa pleiv funcziuneschi bein ed endretg ei noss'administratura Giuliana gia dapi onns responsabla directamein ni era indirectamein. Per siu bien maun, sia savida enorma en tuts fatgs che pertuccan nossa pleiv, naven da pladir plevons e paders per messas dalla dumengia entochen tiel fixar ils tscheins per schar vi ils praus pervenda, naven da procurar ch'ei vegni pagau mintga quen entochen tier pladir e motivar tut quellas e quels che contribueschan il lur pil beinfuncziunar da nossa pleiv, per tut quei ed aunc per bia auter engraziel a Ti Giuliana era en num da miu consuprastont Armin e secapescha era en num dall'entira pleiv da cor.

Jeu giavischel a Ti Giuliana che quella flomma che dat a Ti l'energia per Tiu enorm engaschi per nus ardi aunc ditg e fetg.

A vus tuts che essas vegni oz cheu per tedlar e s'informar tgei che marscha en pleiv mo era a tut las autras parochianas e parochians da nossa pleiv engraziel per la participaziun a nossa communidad e pil sustegn visavi tut quels che s'engaschan sin ina moda ni l'autra per nossa pleiv.

A nos attempai e malsauns che san muort vegliadetgna ni malsogna buca pli prender activamein part da nossa cuminonza giavischel jeu tut bien, buna sanadad e pazienza en lur mintgadi.

Possi il bien Diu accompagnar nus e nossa pleiv cun siu buntadeivel maun sin tut nossas vias.

Walter Deplazes, president